

## PRAKATA

Sudah menjadi resam dunia di zaman pascanormal ini untuk diduga dengan keserentakan keberentakan bertalu-talu yang menguji negara dan masyarakat tanpa mengenal batas sempadan. Ketegangan geopolitik semakin memuncak, perbalahan tarif bergolak, kemusnahan iklim kian meruncing, malah pasaran kewangan berayun penuh ketidaktentuan. Sungguhpun kejelasan dasar tarif di Amerika Syarikat memberikan sedikit kelegaan, namun risiko yang tertumpu kepada sektor serta kemungkinan tindakan timbal balik terus berlegar. Ini mampu mengganggu sistem perdagangan global selanjutnya dan merencatkan pertumbuhan.

Sungguhpun dunia menempuhi tantangan yang hebat, Malaysia tidak boleh memilih jalan paling mudah demi kelegaan sementara. Sudah sekian lama rakyat menuntut pembaharuan sebenar. Sebagai pentadbiran yang tulus memegang amanah rakyat, Kerajaan perlu menyeimbangkan risiko luar dengan keperluan mengatasi cabaran struktur yang lama membelenggu pertiwi. Dipandu oleh kerangka Ekonomi MADANI, tugas kita bukan semata-mata menyediakan landasan bagi pertumbuhan yang bermakna, tetapi juga mengembalikan maruah rakyat, mempertingkatkan mutu kehidupan dan memastikan kekayaan negara dapat dinikmati secara saksama oleh segenap lapisan masyarakat.

Kita masih di bibit awal perjalanan reformasi negara, namun hasilnya sudah boleh dikecapi. Prestasi pertumbuhan ekonomi sebanyak 4.4% pada separuh pertama 2025 mengatasi banyak negara serantau yang turut merasa bahang kejutan tarif. Pertumbuhan ini juga bersifat menyeluruh: isi rumah kekal berbelanja dengan yakin, pelaburan awam dan swasta terus meningkat, sektor pelancongan terus rancak, malah aktiviti pembinaan giat berjalan. Pada masa yang sama, kelangsungan hidup rakyat lebih terpelihara. Kadar pengangguran mencatat paras terendah dalam sedekad, inflasi kekal rendah, sementara ringgit muncul antara mata wang paling berdaya tahan di rantau ini. Kendatipun sistem perdagangan global kian perlahan, pengeksport kita tetap menyesuaikan diri sambil mengekalkan pekerjaan dan daya saing. Berbekalkan kekuatan ini, ekonomi Malaysia dijangka mencatat pertumbuhan antara 4% hingga 4.8% pada 2025 dan 4% – 4.5% pada 2026.

Belanjawan 2026 merupakan edisi keempat dalam siri Belanjawan MADANI dan yang terulung di bawah Rancangan Malaysia Ketiga Belas, 2026 – 2030 (RMK13). Ia menandakan peralihan daripada proses reformasi kepada era transformasi, melakar perjalanan di mana pemulihan segera digantikan dengan pembaharuan jangka masa panjang. Pelaburan strategik yang digariskan di bawah RMK13 menyantuni dua tonggak Ekonomi MADANI, yakni 'Menaikkan Siling' potensi negara dan 'Menaikkan Lantai' kesejahteraan rakyat. Ikhtiar ini dirangka untuk memacu pertumbuhan, menjulang peranan Malaysia dalam rangkaian bekalan global dan memperkukuh modal insan anak watan. Dengan ini, rakyat boleh menikmati gaji yang lebih baik, peluang mobiliti sosial yang tulen dan mutu kehidupan yang lebih tinggi. Dengan RMK13, Malaysia akan memperluas kepakaran dalam sektor pertumbuhan dan nilai yang tinggi seperti kecerdasan buatan dan tenaga boleh baharu. Wawasan ini adalah untuk melonjakkan negara ke barisan hadapan pemain teknologi dunia, sekali gus memampankan kemakmuran untuk generasi akan datang.

Dengan reformasi yang dijalankan, Malaysia tampil semakin yakin menyuarakan pandangannya di pentas dunia. Seiring dengan sejarah kita sebagai sebuah negara berdagang, kita memilih keterlibatan dan kerjasama sebagai jalan ke hadapan. Tatkala kita bersiap menyambut Tahun Melawat Malaysia 2026 dan menamatkan tempoh Kepengerusian ASEAN, kita melangkah dengan tekad baharu: menempatkan Malaysia sebagai jambatan serantau, rakan yang dipercayai dalam kalangan negara Selatan Global serta pendukung pertumbuhan yang lebih adil dan lestari. Tinjauan Ekonomi 2026 ini bukan sekadar menilai pencapaian setakat ini, malah menegaskan hala tuju strategik negara. Sungguhpun kita dibadai gelora, Malaysia tetap mampu mara dengan daya tahan, keanjalan dan keyakinan.

Di zaman pascanormal ini, setiap krisis turut membenihkan peluang. Ia mengingatkan saya akan firman Allah dalam al-Quran (62:10), bahawasanya setelah selesai bersolat, manusia diseru untuk bertebaran di muka bumi bagi mencari rezeki dan peluang. Begitulah juga hakikatnya buat Malaysia hari ini. Segala ujian yang dilalui menjadi peringatan agar kita bermuhasabah dengan pengalaman silam. Pada masa yang sama, ia turut memanggil kita untuk bangkit bersama, merintis ufuk baharu dan mendaki mercu kejayaan lebih gemilang. Kerangka Ekonomi MADANI sudah menggariskan agenda reformasi ini, hatta, apa yang tinggal hanyalah untuk kita beristiqamah di landasan ini dengan kesatuan, kestabilan dan tekad. *Insyaa-Allah*, sejarah tidak akan memperingati detik ini semata-mata akan onar dan duri yang dilalui, tetapi ia akan mengiktiraf keberanian kita untuk membina semula negara tercinta. Dengan nama Allah Yang Maha Pemurah lagi Maha Penyayang.





**ANWAR IBRAHIM**  
MENTERI KEWANGAN MALAYSIA  
10 Oktober 2025



## EKONOMI NEGARA 2026

pada harga malar 2015  
(bahagian kepada jumlah dalam %)



¹ Termasuk perubahan dalam stok  
Sumber: Kementerian Kewangan Malaysia